

L Comun General tolarà dant la costion de la chërta d'identità ladina

A la Procuradora Cristina Donei ge saessa bela na verscion unitèra, ma l'é amò desvaliva considrazions da fèr

La chërta d'identità ladina soscedea amò polemiches. Tor sù o manco l ladin dolomitan? L model te doi lengac da durèr ti comuns de Fascia era jà stat aproà dal Ministèr amò a la fin del 2009. N model che, descheche se sà, perveit la verscion bilingue per talian e fascian standard.

De firé de chest an l Comprenjorie Ladin de Fascia, per ousc de sie president Leonardo Bernard, se aea palesà a la leta per tor dant de nef la dezijion del lengaz da durèr sun chest model, per poder ruèr a na verscion medema per duc i ladins, se i etres fossa stac duc a una desponìboi a l fèr.

Aessa bastà che da la Provinzia

de Busan, dant de tor na dezijion, i se fae sentir te Fascia.

“Ampò nesciugn ne à domanà nia – disc la Procuradora Cristina Donei, che su la costion no la se sent amò de palesèr na posizion. – L Comun General, ent ritadin del Comprenjorie, l'é formalmenter atif dai 28 de messèl – la ne à dit - e l'é ence aministradores neves, che cogn amò vegnir metui en consaputa de la situazion. Se trata segur de na costion che à n peis politich – disc amò la Procuradora – che metaré sun desch al più prest. A mi personalmente me piajesse che sie na verscion unitara che ne lea a le altre val ladine, ma l'é na dezijion che cognon valutar dalvers e tor duc ensema.”